



HENRI COFFI

Naci na Bonaire pero biba desde su dos aña, Henri Coffi a construi su bida na Aruba. E ta gradua como ingeniero electrico y a inicia su carrera profesional cu Lago den e ramo di ingenieria cu el a studia p'e. Durante e 'oil crisis' na aña '70, el a yuda negocia un contract nobo entre Lago y WEB, den cual periodo e prijs di azeta a subi for di \$2 te cu \$20 pa baril. Despues el a sigui como Employee Relations Manager y Manager di Executive Development and Compensation. Cu ceramento di Lago el a hay'e ta negocia cu empleado, pensionadonan y cu Exxon mes, pa sigura derechonon na keda atroyeya. Hendenan cu a keda retira a bai cas c'un averahe di 3 aña di salario. Di eynan pawor, Henri Coffi a crea su number na momento di sinta na cualkier mesa di negosacion.

"mandato" of "labor" of "poder" cualnan casi semper ta den conflicto cu profesionalismo. Ehempel ta cu tin ora un minister bisa su departamento pa haci algo, e departamento ta core haci'e lagando tur logica y profesionalismo un banda. Ami semper a para defende mi posicion cu argumentonan valido y mi ta evalua cu cautela cualkier pedido of demanda straño cu ta bin di un otro, sea e ta un gobernante of no. P'esei, no ta straño cu mi a encontra problemanan ora cu gobiernantenan a pone mi den posicion di escohe: sea haci local na kier of mantene mi principionan. Ami semper a escohe pa mantene mi principionan.

F: Último Coffi tabata den e Raad di Hospital, dicon berdaderamente no ta 'den mas'?

H: Mi a funciona pro-deo den e bestuur di Hospital pa casi 10 aña y como presidente di bestuur pa casi 8 aña. Semper mi a boga pa Hospital traha hunto cu tur departamento di Gobierno pero ta keda un entidad independiente di politica.

Mi no a bandona e bestuur pero a wordu saca pasobra mi ta sigui kere cu politiconan no mester ta den posicion pa tuma control di bestuur di Hospital. Na Aruba, e situacion a wordu crea c'un solo entidad di gobernacion tin poder y control total riba maneho di salubridad publico, seguro medico, e grupo di medico di cas, e grupo di specialistanan, inspeccion medico y tambe Hospital. Mi opinion ta cu mester tin un balance den responsabilidad y poder pa sigura cu cuida medico ta keda funciona optimalmente.

F: Hospital nobo, si of no?

H: Pa mas di un decada no tabata tin un maneho gubernamental fiho tocante hospital. Tempo cu mi a drenta bestuur, tabatin un proyecto pa mehora e situacion di Hospital, pero e proyecto no a sigui pasobra e mandatario no tabata di acuerdo cu loke

e arquitecto a diseña. Prome c'un arquitecto nobo por a caba cu su trabao, gobierno a cambia y e proyecto no a sigui. E maneho di e mandatario nobo tabata pa no mehora Hospital, pero pa traha clinicanan rond di hospital y usa esaki primeramente como lugar pa cuida di patientnan na cama. Despues a bin otro gobierno y otro maneho esta pa bin c'un hospital nobo na otro sitio. E problema di tur e cambionan aki y e ausencia di un maneho fiho ta cu despues di 12 aña, ainda no tin bista riba cu rumbo Aruba lo bay cu e asunto di Hospital.

E problema original a keda; un hospital nobo lo ta deseabel pero ta costa hopi placa, y 12 aña pasa no por a haya fianza of garantia ni di Gobierno, tampoco di Hulanda. Pero cu ta esencial pa yega na un decision y un maneho fiho, ta sigur.

F: AZV tabata un bon idea?

H: AZV a bin na vigor cu meta pa "tur hende" haya cuida medico igual.

Prome cu eleccion, politiconan a dicidi di introduci e programa anke tabatin bastante rason pa studia implementacion di AZV mas extenso. Ora cu e programa a bin na vigor, un experto riba asuntonan medico a declara "en nu gaat het grote stelen beginnen" pasobra tabata bisto cu no tabata tin control adecua pa evita gastonan excesivo. Manera hopi asunto den cual politiconan ta involvi, un bon idea no necesariamente ta traduci den un bon programa. Den mi opinion si politiconan no por a maneha departamentonan di gobierno manera e planta di awa y electricidad, e aeropuerto, e 'haven', e sistema di telefon etc, y mester a combertinan den NV's pa nan por opera eficientemente, con e politiconan por a kere cu cuida medico pa 100 mil hende si nan por a maneha bon?

F: Por tene gastonan medico bou control?

H: Si esaki ta posibel, pero mester envolve expertonan riba tereno di seguro medico.

Lago tabatin un programa cu a duna cuida medico na tur su empleadonan y nan familia. E programa tabatin reglanan di control di gastonan. Hendenan no por a haya tur cos por nada y mester a contribui. Pero nan tabata haya tur cuida medico necesario aki na Aruba of pafor di Aruba. Despues cu Lago a sera un grupo di pensionadonan a opera un programa di cuida medico pa nan mes pa mas cu 10 aña, cu gastonan bon bou di control. Si esnan cu a cumniza cu AZV tabatin interes di bin cu control, nan tabata tin hopi ehempel disponibel aki na Aruba mes.

F: Coffi ta di acuerdo cu e 'modelo suizo' pa personal den e mundo medico, esta tres aña y djey bek pa nan pais?

H: Suiza ta un pais rondona cu centro nan medico di mas avanza na mundo y nan por pone exigencianan specifico y haya hopi hende cu kier bin nan pais. Na Aruba hopi biaha nos a enfrenta escasez di hendenan medico, manera nurse nan specializa, of cierto specialistanan manera esnan specializa den problem anan di riñon y nos mester busca hopi pa haya hendenan cu kier bin traha aki. P'esei, mi no ta kere cu nos por sin mas usa un sistema modelo Suiza pero nos mester ta flexibel pa por yena nos necesi dadnan medico. Tambe nos mester mira ki tipo di specialistanan nos kier pa bin Aruba, Mi ta sigur cu nos por haya hopi cu no ta educa na e nivel cu nos lo desea. Si nos usa un sistema cu no ta flexibel, nos por haya nos ta emplea esnan cu no ta capaz di avanza nos cuida medico, pero cu si nos ta avanza nan posicion economico.

F: Kico e mundo politico por siña di e sector priva?

H: Den companianan priva cu ta funcionan bon por observa algun elementonan cardinal cu no ta usual den gobierno: Nan ta emplea hende den posicionnan clave a base di nan capacidad. Nan ta duna e hendenan aki autoridad y responsabilidad pa actua. Nan ta mantene nan mes na reglanan di control, contabilidad y etica.

Den gobernacion, nos tin experiencia cu lo contrario ta e caso: Nombracionan no ta a base di capacidad pero di posicion politico. Esnan nombra di e manera aki, ta keda sin autoridad y tin obligacion di actua segun e politico ta pidi. No ta mantene reglanan na un manera desea. E resultado ta cu den gobernacion cu regularidad nos ta mira casonan di hende cu

ta wordu hala un banda, segun e mandatario ta desea, pero ta keda emplea sin trabao propio y sin consecuencia algun pa e mandatario of su carter.

F: Den su opinion, Aruba mester di su compania nacional di aviacion?

H: Aruba por beneficia hopi mes di un compania cu ta usa e number di Aruba y ta maneha dor di profesionalnan cu no ta corrupto y cu sa con pa defende interes di Aruba. Aruba por mehora of mantene su reputacion turistico c'un compania di aviacion dedica na duna servicio excelente na turismo. Pero si un "compania nacional" kiermen un compania den cual politiconan ta dicidi maneho, ta viaha por nada, ta emplea centenares di amigonan, ta duna ticket pornada na tur hende, no!, esei no ta loke Aruba mester.

F: En particular kico San Nicolas por haci pa bay dilanti?

H: Dia pa dia San Nicolas ta mas y mas isola for di e otro partinan di Aruba y compara cu antes, servicio gubernamental ta bai atrás. P'esei, pa mehora e situacion San Nicolas mester exige servicionan gubernamental igual cu Oranjestad. Exihi pa e camindanan keda drecha y c'un caminda alternativa keda habri pa aliva trafico sin warda pa e famoso "4 baans weg". Comerciantenan mester of rece articulonan cu hende kier cumpra, no left-overs di otro parti of comestibelnan casi putri. Lago nos mes hendenan adkeri tereno na Seroe Colorado pa traha cas y desaroya un bario nobo cu lo yuda San Nicolas. Den pasado, ni 5% di e presupuesto di Aruba no tabata distinta pa San Nicolas, awor, niun hende sa si esei a subi of baha.

F: Lago a dañu nos medio-ambiente?

H: Lago a opera pa 60 aña na Aruba y semper a cumpli cu y surpasa tur leyman ambiental cu tabata existi na Aruba. Despues cu Lago a sera, den negociacionnan cu a dura como 8 aña, Lago y Gobierno di Aruba a base di studionan extenso hasi dor di expertonan di Aruba, Hulanda y Merca, a yega na acuerdonan riba con y kico mester keda haci pa limpia e teritorio completo unda e refinaria ta localisa. E acuerdonan a keda finaliza y tur trabao di limpieza ambiental a keda cumpli segun palabracion y na satisfaccion di tur partido.

F: Nos maneho di admision di stranhero mester ta stricto of mas liberal?

H: Ami ta kere cu Aruba mester dicidi riba su destino, i no papia so. A keda demostra cu nos poblacion ta

mucho chikito pa haya hende pa tur e tareanan cu e comunidad ta exige. Nos mester ta firme pero flexibel tambe cu admision di stranhero. E cuestion no solamente ta asunto di ta stricto of liberal, pero tambe di kico ta humano pa haci. Un persona cu bin Aruba pa yuda desaroya nos pais tambe tin derecho, deseo y necesidadnan. Con nos ta anda cu esakianan ta un muestra di con civiliza nos ta.

F: Cua ta e mihor manera pa studentenan prepara pa e trabounan di futuro?

H: Nos mihor studentenan mester haya oportunidad pa bai na e mihor scolnan sea na Merca of Europa. Si nos kier ta un pais desaroya, nos mester di hendenan cu por competi na nivel di cualkier Mericano of Europeo ora ta toca interes di Aruba. Esaki kiermen cu nos mester ta dispuesto pa inverti den educacion di nos mihor studentenan dunandonan buensnan selectivo pero completo pa studia na lugarnan manera Harvard, MIT y universidadnan similar di Europa. Si nos hisa e nivel cu nos studentenan por alcanza door di nan mes esfuerzo y trabao duro, esaki por bira e meta cu tur estudiante di Aruba lo kier alcanza. Asina nos lo tin un incentivo pa drecha e direccion di nos educacion cu ta deteriorando aña pa aña.

F: Nos politiconan ta tuma cos mucho personal?

H: Si, y nan ta tuma venganza na lugar di pensa riba local a pasa y con pa evita of mehora e situacion.

F: Ta dificil pa Henri duna su opinion?

H: Nunca mi no tabata tin dificultad pa duna mi opinion. No tur ora esaki ta cay den bon tera, pero semper mi ta dispuesto pa argumenta e posicion cu mi ta propaga.

Den mi trabou na Lago, tabata un rekesito pa duna bo opinion "loud and clear", y si bo tin miedo di haci esaki, bo no ta wordu considera como material pa posicionar di confiansa of ehecutivo y nunca bo lo no avanza na nivel halto.

Mi posicion final como Vice Presidente di e compania ta un indicacion cu mi ta un hende cu ta y lo duna mi opinion.

F: Cual ta e siguiente reto pa Sr.Coffi?

H: Pa basta aña mi ta den bestuur di Casa Cuna y di e fundacion Lago Annuity Foundation. Tambe mi ta yuda studentenan cu ta busca informacion pa nan proyectonan di scol. Selectivamente mi ta funciona tambe como advisor den sector priva.■